

雷三妙博

民夢女異

傳記傳志

牛幻柳集

應

戲殺異

貞

傳志傳記





雷 民 傳

沈既濟撰

叢書集成初編

(補印本)

雷民傳及其他七種

一九三九年十二月初版  
一九六〇年五月補印

商務印書館出版

上海洪興印刷廠印刷

# 雷民傳

唐 沈既濟撰

羅州之南二百里至雷州。爲海康郡。雷之南瀕大海。郡蓋因多雷而名焉。其聲恆如在簷宇上。雷之北高亦多雷聲。如在尋常之外。其事雷畏敬甚謹。每具酒餼奠焉。有以麋肉雜魚食者。霹靂輒至。南中有木名曰棹。以煮汁漬梅李。俗呼爲棹汁。雜麋肉食者。霹靂亦至。犯必響應。牙門將陳義傳云。義卽雷之諸孫。昔陳氏因雷雨晝冥。庭中得大卵。覆之數月。卵破。有嬰兒出焉。自後日有雷扣擊戶庭。入其室中。就於兒所。似若乳哺者。歲餘。兒能食。乃不復至。遂以爲己子。義卽卵中兒也。又云。嘗有雷民畜豕犬。其耳十二。每將獵。必咎犬。以耳動爲獲數。未嘗五動。一日諸耳畢動。旣獵。不復逐獸。至海旁測中。嗥鳴。郡人視之。得十二大卵。以歸。置於室中。後忽風雨。若出自室。旣霽。就視卵破。而遺甲存焉。後郡人分其卵甲。歲時祀奠。至今以獲得遺甲爲豪族。或陰冥雲霧之夕。郡人呼爲雷耕。曉視野中。果有壑跡。有是乃爲嘉祥。又時有雷火發於野中。每雨霽得黑石。或圓或方。號雷公墨。凡訟者投牒。必以雷墨雜常墨書之。爲利人或有疾。卽掃虛室。設酒食。鼓吹旛蓋。迎雷於數十里外。卽歸屠牛麋以祭。因置其門。鄰里不敢輒入。有誤犯者爲唐突。大不敬。出豬牛以謝之。三日又送如初禮。又云。嘗有雷民。因大雷電。空中有物。豕首鱗身。狀甚異。民揮刀以斬。其物踏地。血流通中。而震雷益厲。其夕淩空而去。自後揮刀民居室。頻爲天火所災。雖逃去輒如故。父兄遂擯出。乃依山結廬以自處。災復隨之。因穴崖而居。災方止。或云。其刀尙存。雷民圖雷以祀者。皆豕

首鱗身也。

章苟

吳興章苟于田中耕以飯置菰裏每晚取食飯亦已盡如此非一後伺之見一大蛇偷食苟遂以鉞叉之蛇走苟逐之至一穴但聞啼聲云斫傷我矣或言付雷公令霹靂殺須臾雷雨霹靂覆苟上苟乃跳梁大罵曰天使我貧窮展力耕墾蛇來偷食罪當在蛇反更霹靂我耶乃是無知雷公雷公若來吾當以鉞斫汝腹須臾雲雨漸散轉霹靂于蛇穴中蛇死者數十。

李鄺

唐李鄺北都介休縣民送解牒夜止晉祠宇下夜半聞人扣門云介休王暫借霹靂車某日至介休收麥良久有人應曰大王傳語霹靂車正忙不及借其人再三借之遂見五六人秉燭自廟後出介休使者亦自門騎而入數人共持一物如幢扛上環綴旗旛授與騎者曰可點領騎即數其旛凡十八葉每葉有光如電起民遂遍報隣村今速收麥將有大風雨悉不之信乃自收刈至日民率親戚據高阜候天色及午介山上有雲氣如鑪烟須臾蔽天注雨如綆風吼雷震凡損麥千餘頃數村以民爲妖訟之工部員外郎張周封親觀其推案。

雷公廟

雷州之西雷公廟百姓每歲配連鼓雷車具酒穀奠焉有以魚鼈肉同食者立爲霆震皆敬而憚之每大

雷雨後。多于野中得礫石。謂之雷公墨。叩之鎗然。光瑩如漆。凡訟者投牒。必以雷墨。雜常墨書之。爲利。又如霹靂處。或土木中得楔如斧者。謂之霹靂楔。小兒佩帶。皆辟驚邪。孕婦磨服。爲催生藥。必驗。

### 雷丹

吳智甫知撫州崇仁縣。當七月下旬。晚坐廳治事。風雨忽作。雷電總至。霹靂相繼數十聲。庭中火塊迸走。有飛火大如燕。自勑書樓過西南。須臾稍息。外報村中民饒相家。貯米倉遭燕。倉在田間。故寺基上。火至此而燃。月餘方止。倉及穀皆燒變如麤狀。復數日。有商客數道人過其處。以石擊所傷倉敗穀。堅如石。成五色。或如蜂蝶。或如龜魚。蠶蛾之類。或有似穀穗。客取數石藏去。焚香拜于前。及取碎米于盆內研細。酌以水調服之。人問其故。曰雷丹也。凡有禍病者悉治。遂去。邑人聞之。持以療祟病。輒愈。

### 雷斧

黃宋永浚莆田人。師憲狀元之從兄也。幼時戲於廳。正晝雲雨晦冥。雷震轟轟。繞柱穿壁而過。家人意其驚怖。爭出尋之。原在戲處端坐。無所覺也。得一斧長三寸。非鐵非石。鑿小孔而無柄。蓋雷神所執而誤墮者。諸人傳翫未已。黃持入藏之。雷復至。已而其物不可取。俄頃開霽。





傳 貞 應 牛

撰 昭 若 宋

本館據龍威秘書  
本排印初編各叢  
書僅有此本

# 牛應貞傳

唐 宋若昭撰

牛肅長女曰應貞。適宏農楊唐源。少而聰穎。經耳必誦。年十三。凡誦佛經二百餘卷。儒書子史又數百餘卷。親族驚異之。初應貞未讀左傳。方擬授之。而夜初眠中。忽誦春秋起惠公元妃孟子卒。終智伯貪而愎。故韓魏反而喪之。凡三十卷。一字無遺。天曉而畢。當誦時。若有教之者。或相酬和。其父驚駭。數呼之。都不答。誦已而覺。問何故。亦不知。試令開卷。則已精熟矣。著文章百餘首。後遂學窮三教。博涉多能。每夜中眠熟。與文人談論。文人皆古之知名者。往來答難。或稱王弼。鄭元。王衍。陸機。辯論鋒起。或論文章。談名理。往往數夜不已。年二十四而卒。今採其文。題題問影賦。著於篇。其序曰。庚辰歲。予嬰沈痛之疾。不起者十旬。毀頓精神。羸悴形體。藥物救療。有加無瘳。感莊子有題題責影之義。故假之爲賦。庶解疾焉。題題問於予影曰。君英達之人。聰明之子。學包六藝。文兼百氏。頤道家之祕言。探釋部之幽旨。既虔恭於中饋。又希慕於前史。不矯枉以干名。不毀物而成己。伊淑德之如此。卽精神之足恃。何故羸厥姿貌。沮其精神。煩冤枕席。憔悴衣巾。子惟形兮是寄。形與子兮相親。何不誨之以崇德。而教之以自脩。異萊妻之樂道。殊鴻婦之安貧。豈痼疾而無生賴。將微賤而欲忘身。今節變歲移。臘終春首。照晴光於郊甸。動暄氣於梅柳。水解凍而繞軒。風扇和而入牖。固可觸憂釋疾。怡神養壽。何默爾無營。自貽伊咎。僕於是勃然而應曰。子居於無人之域。遊乎魑魅之鄉。形旣圖于夏鼎。名又著於蒙莊。何所見之不博。何所談之不老。夫影依日而生。像

因人而見。豈言談之足曉。何節物之能辨。隨晦明以興滅。逐形骸以遷變。以愚夫畏影。而蒙鄙之性。以彰智者視陰。而遲暮之心。可見伊美惡。今由己影何辜。而遇譴。且子聞至道之精。矧今冥至道之極。昏兮默。達人委性命之修短。君子任時運之通塞。悔吝不能纏。榮耀不能惑。喪之不以爲喪。得之不以爲得。君子何乃怒。予之不賞。芳春責子之不貴華飾。且吾之秉操。奚子智之能測。言未卒。魍魎惕然而驚。歎而起曰。僕生於絕域之外。長於荒遐之境。未曉智者之處身。是以造君而問影。旣談元之至妙。請終身以藏屏。初應貞夢製書而食之。每夢食數十卷。則文體一變。如是非一。遂工爲賦頌。文名曰遺芳。



三 夢 記

白 行 簡 撰

本館據龍威秘書  
本排印初編各叢  
書僅有此本

# 二夢記

唐 白行簡撰

人之夢異於常者有之。或彼夢有所往而此遇之者。或此有所爲而彼夢之者。或兩相通夢者。天后時。劉幽求爲朝邑丞。嘗奉使歸。未及家十餘里。適有佛堂寺。路出其側。聞寺中歌笑歡洽。寺垣短缺。盡得覩其中。劉俯身窺之。見十數人兒女雜坐。羅列盤饌。環繞之而共食。見其妻在坐中。語笑。劉初愕然。不測其故。久思之。且思其不當至此。復不能捨之。又熟視。容止言笑無異。將就察之。寺門閉不得入。劉擲瓦擊之。中其鼻。洗破。迸走散。因忽不見。劉踰垣直入。與從者同視殿廡。皆無人。寺局如故。劉訝益甚。遂馳歸。比至其家。妻方寢。聞劉至。乃敍寒暄。訖。妻笑曰。向夢中與數十人同遊一寺。皆不相識。會食於殿庭。有人自外以瓦礫投之。杯盤狼藉。因而遂覺。劉亦具陳其見。蓋所謂彼夢有所往而此遇之者矣。

元和四年。河南元微之爲監察御史。奉使劍外。踰旬。予與仲兄樂天隴西李杓直同遊曲江。詣慈恩佛舍。徧歷僧院。淹留移時。日已晚。同詣杓直修行里第。命酒對酌。甚歡暢。兄停杯久之曰。微之當達梁矣。命題一篇于壁。其詞曰。春來無計被春愁。醉折花枝作酒籌。忽憶故人天際去。計程今日到梁州。實二十一日也。十許日。會梁州使適至。獲微之書一函。後寄紀夢詩一篇。其詞曰。夢君兄弟曲江頭。也入慈恩院裏遊。屬吏喚人排馬去。覺來身在古梁州。日月與遊寺題詩。日月率同。蓋所謂此有所爲而彼夢之者矣。貞元中。扶風竇質與京兆韋旬同自亳入秦。宿潼關逆旅。竇夢至華岳祠下。見一女巫。黑而長。青裙素襦。

迎路拜揖。請爲之祝神。寶不獲已。遂聽之。問其姓。自稱趙氏。及覺。具言於韋。明日至祠下。有巫迎客。容質妝服。皆所夢也。顧韋謂曰。夢有徵也。乃命從者視囊中。得錢三環。與之。巫撫掌大笑。謂同輩曰。如所夢矣。韋驚問之。對曰。昨夢二人從東來。一髯而短者。祝醕。獲錢三環焉。及旦。乃徧述於同輩。今則驗矣。寶因問巫之姓氏。同輩中曰。姓趙氏。自始及末。若合符契。蓋所謂兩相通夢者矣。

行簡曰。春秋及子史。言夢者多。然未有載此三夢者矣。世人之夢亦衆矣。亦未有此三夢。豈偶然也。抑亦必前定耶。予不能知。今備記其事以存錄焉。

行簡云。淮安西市帛肆。有販粥求利而爲之平者。姓張不得名。家富於財。居光德里。其女國色也。嘗因晝寢。夢至一處。朱門大戶。檠戟森然。由門而入。望其中堂。若設燕張樂之爲。左右廊皆施幃幃。有紫衣吏引張氏于西廊幃。見少女如張等輩十許人。皆花容綽約。釵鈿照耀。既至。促張妝飾。諸女迭助之。理澤傅粉。有頃。自外傳呼侍郎來。自隙間窺之。見一紫綬大官。張氏之兄嘗爲其小吏。識之。乃言曰。吏部沈公也。俄又呼曰。尙書來。未有識者也。遂巡復連呼曰。某來某來。皆郎官以上。六七個坐廳前。紫衣吏曰。可出矣。羣女旋進金石。絲竹鏗鉤。震響中署。酒酣。王并州見張氏而視之。尤屬意。謂之曰。汝習何藝能。對曰。未嘗學聲音。使與之琴。辭不能曰。第操之。乃撫之而成曲。與之箏亦然。琵琶亦然。皆平生所不習也。王公曰。恐汝或遺。乃令口受吟詩。鬟梳嫺俏學宮妝。獨立閑庭納夜涼。手把玉簪敲砌竹。清歌一曲月如霜。謂張曰。且歸。辭父母。異日復來。張忽啼寤。手捫衣帶。謂母曰。尙書詩遺矣。索筆錄之。母問其故。泣對以所夢。且曰。殆

將死乎。母怒曰。汝作魘爾。何以爲辭。乃出不祥言如是。因臥病累日。外親有持酒肴者。又有將食來者。女曰。且須膏沐澡淪。母聽良久。豔妝盛色而至。食畢。乃徧拜父母及坐客。曰。時不留。某今往矣。因授衾而寢。父母環伺之。俄爾遂卒。會昌二年六月十五日也。

